

四庫全書

集部

欽定四庫全書

集部

東坡全集卷七十八

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官中書臣高中

謄錄監生臣許思光

欽定四庫全書

東坡全集卷七十八

宋 蘇軾 撰

尺牘一百九首

與朱康叔十七首

某啓專使至復領手教契愛愈深可量感服仍審比日  
起居佳勝為慰舍弟已部賤累到此平安皆出餘庇不  
煩念及珍惠雙壺遂與子由累醉公之德也隆暑萬萬  
以時自重行膺殊相人還上謝

又

令子歸侍左右日有庭闈之樂恨未際見不敢輒奉書  
近見提舉司薦章稍慰輿議可喜可喜作墨竹人近為  
少閒暇俟宛轉求得當續置之呵呵酒極醇美必是故  
人特遣下廳也某再拜

又

某再拜近奉書并舍弟書想必達胡掾至領手教具審  
起居佳勝兼承以舍弟及賤累至特有厚貺羊麵酒果

一捧領訖但有慚忤舍弟離此數日來教尋附洪州遞  
與之已遷居江上臨臯亭甚清曠風晨月夕杖履野步  
酌江水飲之皆公恩庇之餘波想味風義以慰孤寂尋  
得去年六月所寫詩一軸寄去以為一笑酷暑萬乞保  
練

又

某啓酷暑不可過百事墮廢稍疎上問想不深訝比日  
伏想尊履佳勝別乘過郡承賜教及惠新酒到此如新

出甕極為奇珍感愧不可言因與二三佳士會同飲盛德也秋熱更望保練行膺峻陟

又

胡掾與語如公之言佳士佳士渠方寄家齊安時得與之相見也令子必且盤桓待下中前示諭姻親事可留示年月日恐求親者欲知之造次造次

又

某啓因循稍疎上問不審近日尊候何如某蒙庇如昨

秋色益佳郡事稀少想有遊樂無緣展奉但積思念乍  
冷萬冀以時自重

郭寺丞一書乞指揮送與其人甚有文雅必蒙清顧也  
聞其墜馬傷手不至甚乎

又

某啓近附黃岡縣遞拜書必達專人過此領手教具審  
起居住勝淒冷此歲行盡會合何時以增悵然唯祈善  
保敷文宅計此月末方離陳南河淺濫想五六月間方

到北荷公憂恤之深其家固貧甚然鄉中亦有一小莊  
子且隨分過也歸老之說恐未能如雅志又修理積弊  
已就倫次監司朝廷豈有遽令放閒耶問及物食天漸  
熱難久停恐空煩費也海味亦不若食既忝雅契自當  
一一奉白

又

示諭親情事專在下懷然此中殊少士族若有所得當  
立上聞也寫字俟少閒續納上墨竹如可尊意當取次



致左右畫者在此不遠必可求也呵呵

某啓近王察推至辱書承起居住勝方欲裁謝又枉  
教勅益增感愧數日來偶傷風百事皆廢今日微減尚  
未有力區區之懷未能盡也乍暄惟冀以時珍攝稍健  
當別上問次

又

閣名久思未獲佳者更乞詳閣之所向及側近故事迹  
為幸董義夫相聚多日甚歡未嘗一日不談公美也舊

好誦陶潛歸去來常患其不入音律近輒微加增損作  
般涉調哨遍雖微改其詞而不改其意請以文選及本  
傳考之方知字字皆非創入也謹小楷一本寄上却求  
為書拋磚之謂也亦請錄一本與元弼為病勸不及別  
作書也數日前飲醉後作頑石亂篠一紙私甚惜之念  
公篤好故以奉獻幸檢至

又

令子必在左右計安勝不敢奉書舍弟已到官傳聞筠

州大水城內丈餘不知虛的也屏贊硯銘無用之物公  
好事之過不敢不寫裝成送去乞一覽少事不免上干  
聞有潘原秀才以買僕事被禁某與其兄潘丙解元至  
熟最有文行原自是佳士有舉業望賜全庇暑月得早  
出為此人父母皆篤老聞之憂恐萬端公以仁孝名世  
能哀之否恃舊干瀆不敢逃罪天覺出藍之作本以為  
公家寶而公乃輕以與人謹收藏以鎮篋笥然尋常不  
揆以亂道塵獻想公亦隨手將與人耳呵呵

又

某啓武昌傳到手教繼辱專使墮簡感服併深比日尊  
體佳勝節物清和江山秀美府事整辦日有勝遊恨不  
得陪從耳雙壺珍貺一洗旅愁甚幸甚幸佳果收藏有  
法可愛可愛拙疾乍到不諳土風所致今已復常矣子  
由尚未到其寸步千里也未由展奉尚冀以時自重

又

與可船旦夕到此為之泣然想公亦爾子由到此須留

也住五七日恐知之前曾錄國史補一紙不知到否因  
書略示諭生細酒四器正濟所乏珍感生酒暑中不易  
調停極清然閔仲叔不以口腹累人其每蒙公眷念遠  
致珍物勞人重費豈不肖所安耶所問凌翠至今虛位  
雲乃權發遣耳何足掛齒牙呵呵馮君方想如所諭極  
煩留念又蒙傳示秘訣何以當此寒月得暇當試之天  
覺亦不得書此君信意簡率乃其常態未可以疎數為  
厚薄也酒法是用菰豆為麴者耶亦曾見說來不曾錄

得方如果佳錄示亦幸

又

疊蒙寄惠酒醋麵等一一收檢愧荷不可言不得即時  
裁謝想仁明必能恕察老媳婦得疾初不輕今已安矣  
不煩留念食隔已納武昌吳尉處矣適少冗不敢稽留  
來使少間別奉狀次

又

見天覺書中言當世云馮君有一學服朱砂法甚奇惟

康叔可以得之不知曾得未若果得不知能見傳否想  
於不肖不惜也

又

今日偶讀國史見杜羔一事頗與公相類嗟嘆不足故  
書以奉寄然幸勿示人恐有嫌者江令乃爾深可罪然  
猶望公憐其才短不逮而已屢有干瀆蒙不怪幸甚幸  
甚其令章憲今日恐到此知之

杜羔有至性其父河北一尉而卒母非嫡經亂不知

所之會堂兄羔為澤潞判官嘗鞠獄於私第有老婦  
辯對見羔出入竊語人曰此少年狀類吾夫訊之乃  
羔母也自此迎侍而歸又往訪先人之墓邑中故老  
已盡不知所在館於佛寺日夜悲泣忽視屋柱煤烟  
之下見數行書拂而視之乃父遺迹云我子孫若求  
吾墓當於某村家問之羔哭而往果有老父年八十  
餘指其立隴因得歸葬羔官至工部尚書致仕此出  
唐李肇國史補近偶觀書嘆其事頗與朱康叔同相



似因書以遺之元豐三年九月二十五日記

又

近日隨例紛冗有疎上問不審起居何如兩日來武昌如聞公在告何也豈尊候小不佳乎無由躬問左右但有馳系冬深寒溼尤宜慎護

又

章質夫求琵琶歌詞不敢不寄呈安行言有一既濟鼎樣在公處若鑄造時幸亦見為作一枚不用甚大者不

罪不罪前日人還曾附古木叢竹兩紙必已到今已寫得經藏碑附上令子推官侍下計安勝何時赴任未敢拜書也

與胡深夫五首

某啓自聞下車日欲作書紛冗衰病因循至今疊辱書誨感愧交集比日起居佳勝未緣瞻奉伏望以時保練

又

乍到整葺想勞神用浙西數郡例被霖雨颶風之患而

秀之官吏獨以為無災以故紛紛至此公下車倍加綏撫不惜高價廣糴以為嗣歲之備憲司行文欲收糴米此最良策而推戶專斗所不樂故妄造言語聰明所照必不搖也病中手字不謹

又

其久與周知錄兄弟遊其文行才器實有過人不幸遭喪生計索然未能東歸九江託迹治下竊謂仁明必有以安之不在多言今託柳令咨白冗中不盡區區

又

彥霖之政光絕前後君復為僚可喜船斬新輟借知之  
冗中不一

又

某以衰病紛冗裁書不謹惟恕察王京兆因會幸致區  
區久不發都下朋舊書必不罪也

朱行中舍人四首

某啓別後兩奉狀想一一聞達比日履茲春和台候勝

常某留滯贛上以待春水至此月末乃發瞻望惋悵南海雖外然雅量固有以處之矣詩酒之樂恨不日陪接也更冀若時為國保練不宣某再拜

又

某已得舟尚在贛石之下若月末不至當乘小舟往就之買公用人以節級持所齎錢竄去又以疾疫氣多死亡以此求還亦官舟無用多人故悉遣回皆以指揮嚴切甚得力乞知之適少冗馳問不盡區區某再拜

又

少事不當上煩東筦資福長老祖堂者建五百羅漢閣  
極宏麗營之十年今成矣某近為作記公必見之塗中  
為告文安國篆額甚妙今封附去人公若欲觀拆開不  
妨却乞差一公人齎附祖堂者不罪某再拜

又

某啓蒙眷厚借搬行李人感愧不在言也但節級朱立  
者無狀侵漁不已又遂竄去林聰者又歐平人幾死見

禁幸所歐者漸安決不死耳此中多言於法有礙不可帶去故輒牒度云得明公書令某遣還多難畏事想必識此心也買公用人於法無礙故仍舊帶去此二十餘人皆謹力不作過望不賜罪窮途作事皆此類慙忤不可言得二座船不失所幸不貽念陋句數首端欲發一笑耳某再拜

與李之儀五首

某年六十五矣體力毛髮正與年相稱或得復與公相

見亦未可知也前者皆夢已後者獨非夢乎置之不足道也所喜者在海南了得易書論語傳數十卷似有益於骨朽後人耳目也少遊遂卒於道路哀哉痛哉世豈復有斯人乎端叔亦老矣迨云鬚髮已皓然顏極丹且渥僕亦正如此各宜閤嗇庶樂復見也兒姪輩在治下頻與教督一書幸送與某大醉中不成字不罪不罪

又

某啓契濶八年豈謂復有見日漸近中原辱書尤數喜



出望外比日起居住勝某已得舟決歸許如所教而長  
子邁遽捨去深以為恨報除輦運似亦不惡近日除目  
時有如人所料者此後端叔必已信安矣但老境少安  
餘皆不足道乍熱萬萬以時自愛某再拜

又

某以囊裝罄盡而子由亦久困無餘故欲就食淮浙已  
而深念老境知有幾日不可復作兩處又得子由書及  
教語尤切已決歸許下矣但須少留儀真令兒子往宜

興剗制變轉往還頊月餘約至許下已七月矣去歲在  
廉州託孫叔靜寄書及小詩達否叔靜云端叔一生坎  
坷晚節益牢落正賴漁軒賢德能委曲相順適以忘百  
憂此豈細事不爾人生豈復有佳味乎叔靜相友想得  
其詳故輒以奉慶忝不罪

又

近孫叔靜奉書遠遞得達否比來尊體如何眷聚各安  
勝某蒙恩領真祠世間美任復有過此者乎伏惟君恩

之重不可量數遙知朋友為我喜而不寐也今已到處  
即往淮浙間居處多在毗陵也子由聞已歸許秉燭相  
對非夢而何一書乞便與餘惟萬萬自愛某再拜

又

某啓辱書多矣無不達者然不一荅非特衰病簡懶之  
過實以罪垢深重不忍更以無益寒溫之間玷累知交  
然竟不免累公慙負不可言比日承以赴潁昌伏惟起  
居佳勝眷聚各安慶某移永州過五羊度大庾至吉出

陸由長沙至永荷叔靜拏舟相送數十里大浪中作此  
書上問無他祝惟保愛之外酌酒與婦飲尚勝俗侶對  
梅二丈詩云耳

與馮祖仁四首

某慰疏言伏承艱疾退居久矣日月逾邁衰痛理極未  
嘗獲陳區區少解思慕萬一實以漂寓窮荒人事斷絕  
非敢慢也比辱手疏且審孝履支持廓然逾遠追痛何  
及伏惟俯禮適變寬中強食謹奉慰疏不次

又

蒙示長牋繁然累幅光彩下燭衰朽增華但以未拜告  
命不敢具啓荅謝感忤不可言喻老瘁不復疇昔但偶  
未死耳水道間關寸進更二十餘日方至曲江首當詣  
宇下區區非面不既乏人寫大狀不罪手拙簡略不次

又

昨日辱遠迓喜慰難名客散已夜不能造門蚤來又聞  
已走松楸未敢上謁領手教愧悚無地至節想惟孝思

難堪奈何來日當往謁慰節晨蒙惠羊邊酒壺仁者之  
餽謹以薦先感佩不可言也

又

兩日不果詣見伏計孝履如宜欲告偕前日盛會包子  
厨人一日告白朝散絕早遣至不罪不罪家人輩欲遊  
南山祖仁若無事可能同到彼閒行否

與黃師是

行計屢改近者勿累舟中皆伏暑自慰一年在道路矣

不堪復入汴出陸又聞子由亦窘用不忍更以三百指  
諉之已決意旦夕渡江過毗陵矣荷憂愛至深故及之  
子由一書政為報此事乞蚤與達之塵埃風葉滿室隨  
掃隨有然不可廢掃以為賢於不掃也若知本無一物  
又何加焉有詩錄呈簾卷牕穿戶不扃隙塵風葉任縱  
橫幽人睡足誰呼覺歌枕牀前有月明一笑一笑某再  
拜

與廣西憲曹司勳五首

某啓奉別忽二載并走南北不暇附書申問子由轉附  
到天門冬煎故人於我至矣日夜服食幾月遂盡之到  
惠州又遽中領手書懶廢已放不即裁謝死罪死罪

又一云與  
林天和

某啓專人辱書仰服眷厚仍審比來起居清勝至慰至  
慰長子未得耗小兒數日前往河源獨幹築室極為勞  
冗承惠芽蕉數品有未嘗識者幸得徧嘗感愧不已忽  
忽奉謝



又

某啓數日稍稍清冷伏惟起居佳勝構架之勞少休暇  
思企清論日積滯念尚冀保衛區區之至因吳子野行  
附啓不宣

又

某啓專人至賜教累幅慰拊周至且審比來起居佳勝  
感慰兼至某得罪幾二年矣愚陋貪生輒緣聖主寬貸  
之慈灰心槁形以盡天年即目殊健也公別後微疾盡

去想今益康佳養生亦無他術安寢無念神氣自復知  
呂公讀華嚴有得固所望於斯人也居閒偶念一事非  
吾子方莫可告者故崇儀陳侯忠勇絕世死非其罪廟  
食西路威靈肅然願公與程之邵議之或同一陳乞載  
祀典使此侯英魄少信眉於地中如何如何然慎勿令  
人知不肖有言也陳侯有一子在高郵白首頗有立知  
之蒙惠竒茗丹砂烏藥敬餌之矣西路洞丁足制交人  
而近歲綏馭少方殆不可用願為朝廷熟講之此外惟

萬萬自重

又

公勸某不作詩又却索近作閒中習氣不免有一二然  
未嘗傳出也今錄三首奉呈看畢便毀之切祝千萬惠  
州風土差厚山水秀邃食物粗有但少藥耳近報有永  
不叙復指揮正坐穩處亦且任運也子由頗得書甚安  
某惟少子隨侍餘皆在宜興見今全是一行脚僧但吃  
些酒肉耳此書此詩只可令之邵一閱餘人勿視也

與晦夫

一云與趙仲修

某啓辱荅教感服風月之約敢不敬諾庚公南樓所謂老子於此興復不淺便當携被往也

與范夢得八首

某啓一別俯仰十五年所喜君子漸用足為吾道之慶比日起居何如某旦夕南遷後會無期不能無悵惘也過揚見東平公極安行復見之矣新著必多無緣借觀為耿耿耳乍暄惟順候自重因李豸秀才行附啓上問

不宣

又

某啓辱教字起居住勝郊外路遠不當更煩屈臨可且  
寢處耳有事以書垂諭可也界紙望示及來日自不出  
只在舟中靜坐惠貺鳳團感眷意之厚熱甚不謹

又

某啓辱教承台候康勝為惠得請知幸以未謝尚稽詣  
見疎息疎息子功復舊物甚慰衆望來日方往浴室也

人還忽卒不宣

又

某啓不肖所得寡薄惟公愛念以道義相期眷予無窮  
既承感戀不可言乍寒不審起居休否某已次陳橋瞻  
望益遠惟萬萬以時自重

又

今日謁告不克往見辱教伏承文體佳勝楊君舉家人  
服其藥多効亦覺其穩審然近見王定國云張安道書

云曾下疎藥數日不能食又謝之不滿意然不知果爾否有聞不敢不盡

又

某啓辱手東且審起居住勝為慰和篇高絕木與種者皆被光華矣幸甚幸甚舊句竒偉試當強勉繼作忽忽不宣

又

某啓遠遠二年瞻仰為勞辱書承起居住勝慰喜可量

觀罷當往造門併道區區

又

某啓昨日方叔處領手誨今又辱書備增感慰乍冷台  
候勝常末由詣見但有欽仰忽忽上啓

與李無悔

某啓久留浙中過辱存顧最為親厚既去又承追餞最  
遠自惟衰拙衆所鄙棄自非風義之篤何以至此既別  
但有思詠兩辱書教具審起居佳勝今歲科舉聞且就



鄉里承示喻進取之意甚倦盛時美才何遽如此且勉  
之決取為望新文不惜見寄未緣集會惟萬萬自重不  
宣

與李公擇

某啓兩日連見忽忽竟何言暄和起居何如夷中送王  
徐州詩有見及語方是時人以相識為諱欲一見面道  
此為笑竟不見可太息也適所白是宗人棧雅州幕不  
一一

與陳懷立

昨日辱訪感忤不已經宿起居住勝蒙借示子明傳神  
筆勢精妙髣髴莫辨恐更有別本願得一軸使觀者動  
心駭目也嶺海濶絕不謂生還復得瞻奉慰幸之極比  
日履此秋涼起居佳勝少選到岸即伏謁以盡區區

與孫叔靜七首

昨日辱臨顧夙昔之好不替有加感嘆深矣屬飲藥汗  
後不可以風未即詣謝又枉使旌重增悚惕捧手教且

審尊體佳勝旦夕造謁以究所懷

又

辱手教伏審晚來起居佳勝惠示珠攬項所未見非獨  
下視沙塘矣應當一笑羊麪酒醋為惠禮意兼厚敬已  
拜賜感佩之極

又

前日辱下顧尚未走謝悚息不已捧手教承起居佳勝  
卑體尚未清快坐阻談論為悵惘也惠示妙劑及方獲

之幸甚從此衰疾有瘳矣

又

已別瞻企不去心辱手教且審佳勝感慰之極早來風  
起舟不敢解故復少留因來淨惠與惠州三道人語耳  
無緣重詣臨紙悵悵

又

令子重承訪及不暇往別為愧深矣珍惠菜膳增感忤  
也河源藤已領衰疾可恃矣

又

睂山人有巢谷者字元修曾應進士武舉皆無成篤於風義已七十餘矣聞某謫海南徒步萬里來相勞問至新興病亡官為藁殯錄其遺物於官庫元修有子蒙在里中某已使人呼蒙來迎喪頗助其路費仍約過永而南當更資之但未到耳旅殯無人照管或毀壞暴露願公愍其不幸因巡檢至其所特為一言於彼守令得稍修治其殯常戒主者保護之以須其子之至則恩及存

亡耳死罪死罪

又

去德彌月思仰縈懷比日履此新陽起居增勝行路百阻至英方再宿矣少留數日此去尤艱闕借舟未知能達韶否流行坎止輒復任緣不煩深念也後會未卜惟萬萬為國自重

答劉貢父二首

久濶暫聚復此違異悵惻至今公私紛紛有失馳問辱

書感怍無量字畫妍潔及問來使云尊貌比初下車時  
暫且澤矣聞之喜甚比來起居想益佳何日歸觀慰士  
大夫之望未間萬萬為時自重不宣

又

某忝冒過甚出於素獎然迂拙多忤而處爭地不敢作  
久安計兄當有以教督之血指汗顏旁觀之說奈何奈  
何舉官之事有司逃失行之罪歸咎於兄清明在上豈  
可容此小子何與焉茯苓松脂雖乏近効而歲計有餘

未可棄也默坐反照瞑目數息當記別時語耶

答魯子宣三首

某啓流落江湖晚復叨遇惟公知炤如一日也孤愚寡  
與日親高誼謂可永久不謂尚煩藩翰之寄達濶以來  
思仰日深辱書教伏審履茲秋涼台候萬福欣慰之極  
二聖思治求人如不及公豈久外惟千萬為國順時自  
愛

又



自公之西有識日望詔還豈獨契愛之末邊落寧肅公  
豈久外哉示諭塔記久不馳納愧恐之極乞少寬之秋  
涼下筆也親家柳子良宣德赴潞幕獲在屬城知幸知  
幸謹奉手啓冗迫不盡區區

又

某啓辱教伏承台候萬福為慰塔記非敢慢蓋供職數  
日職事如麻歸則為詞頭所迫卒以夜半乃息五更復  
起實未有餘暇乞限一月所敢食言者有如河頤公一

笑而怨之旦夕當卜一邂逅而別

與李公擇

秋色佳哉想有以為樂人生惟寒食重九慎不可虛擲  
四時之變無如此節者近有潮州人寄一物其上云扶  
劣膏不言何物狀似羊脂而堅盛竹筒中公識此物否  
味其名必佳物也若識之當詳以示可分去或問習海  
者子由近作棲賢僧堂記讀之慘凜覺崩崖飛瀑逼人

寒栗

與姜唐佐秀才六首

某啓特辱遠訪意貺甚重衰朽廢放何以獲此悚汗不  
已經宿起居住勝長箋詞義兼美窮陋增光病卧不能  
裁荅聊奉手啓

又

某啓昨日辱夜話甚慰孤寂示字承起居住勝竒蒔佳  
惠感服至意當同啜也適睡不即荅悚息某頓首

又

今日霽色尤可喜食已當取天慶觀乳泉潑建茶之精  
者念非君莫與共之然早來市無肉當相與啖菜飯耳  
不嫌可只今相過某啓上

又

適寫此簡得來示知巡檢有會更不敢邀請會若散早  
可來啜茗否酒麪等承佳惠感愧來旦必如諾十月十  
五日白

又

某啓別來數辱問訊感忤至意毒暑具喜起居佳勝堂  
上嘉慶甚慰所望也知非久適五羊益廣學問以卒遠  
業區區之禱此外萬萬自重不宣

又

某已得合浦文字見治裝不過六月初離此只從石排  
或澄邁渡海無緣更到瓊會見也此懷甚惘惘因見二  
車略道下懇有一書至兒子邁處從者往五羊時為帶  
去轉託何崇道附達為幸

兒子治裝冗甚不及奉啓所借烟蘿子兩卷吳志四冊  
會要兩冊並馳納

與傅維巖秘校四首

某啓專人至承不鄙罪廢長箋見及援證古今陳義甚  
高伏讀愧感仍審比來起居佳勝至慰至慰守局海徼  
淹屈才美然仕無高下但能隨事及物中無所愧即為  
達也伏暑萬萬自愛不宣

又

衰病裁荅草草不訝知不久美解即獲會見至喜至喜  
掩骼之事知甚留意旦夕再遣馮何二士面稟亦有錢  
物在二士處此不覩縷曾城荔子一籃附去人持上不  
罪不罪某又上

又

某啓遠蒙惠書非眷念之厚何以及此仍審比來起居  
佳勝感慰兼集老病之餘復此窮獨豈有再見之期尚  
冀勉進學問以究遠業餘萬萬自愛不宣

又

官事有暇得為學不輟否有可與往還者乎此間百事不類海北但杜門面壁而已彼中如有粗藥治病者為致少許此間如蒼朮橘皮之類皆不可得但不嫌粗賤為相度致數品不罪不罪

與林天和長官二十三首

某啓近辱手書冗中不果即荅悚息悚息春寒想體中佳勝火後凡百想勞神用勤民之意計不倦也未由披



奉萬萬自愛不宣

又

某啓專人辱書具審起居佳勝為慰春物益妍時復尋賞否想亦以雨軫懷也未由往見萬萬若時加攝不宣

又

兒子往循已數日矣賤累閏月初可到此新居旦夕畢工承問及感感不已領書又惠筍蕨益用愧刻聞相度移邑果爾否

又

某啓辱手教伏承起居佳勝甚慰馳仰承問賤累正月  
末已到贛上矣閏月上旬必到此也考室勞費乃老業  
也旦夕遷入末由會見萬萬以時自重不宣

又

花木栽感留意惠貺鹿肉尤增慚荷某又上

又

某啓近數奉書想皆達雨後清和起居住佳勝花木悉佳

品又根據不傷遂成幽居之趣荷雅意無窮未即面謝  
為媿耳人還忽忽不宣

又

某啓昨辱訪別尤荷厚眷恨老病龍鍾不果詣達愧負  
多矣經宿起居何如果成行未忘已為民誰如君者願  
益進此道譬之農夫不以水旱而廢蓰蓂也此外萬萬  
自愛不宣

又

某啓比日蒸熟體中佳否承惠楊梅感佩之至聞山薑  
花欲出錄夢得詩去庶致此餽也呵呵豐樂橋數木匠  
請假暫歸多日不至敢煩旨麾勾押送來為幸草草奉  
啓不罪

又

某啓人來辱書具審比日尊體佳勝甚慰所望出意加  
減秧馬曲盡其用非拊字究心何以得此具白太守矣  
乍熟萬萬以時加普不宣

又

某啓人來辱手教具審起居佳勝吏民惠愛謠頌布聞  
甚慰所望秧馬聊助美政萬一耳何足云乎承示喻愧  
悚之至僧磨已成秋涼當往觀也毒熱萬萬為民自愛  
不宣

又

某啓辱教承徵疾已平起居清勝甚慰馳仰暑雨不常  
官事疲勤攝衛為難惟加意節調以時休息為佳也忽

忽不宣

又

某啓多日不奉書思仰之至伏暑尊體何如惠貺荔子  
極佳郡中絕少得與數客同飲幸甚幸甚未由會合萬  
萬以時自愛某再拜

又

某啓辱手教承起居住佳勝久以冗率有闕馳問愧企深  
矣承惠龍眼牙蕉皆郡中所乏感忤之至未由瞻奉萬

萬以時自重不宣

又

高君一臥遂化深可傷念其家不失所否瘴疫橫流僵仆者不可勝計奈何奈何某亦旬日之間喪兩女使謫居牢落又有此狼狽想聞之亦為之撫然也某再啓

又

某啓近日辱書伏承別後起居住勝甚慰馳仰數月月色清絕恨不同賞想亦對景獨酌而已未即披奉萬萬

自重人還布啓不宣

又

某啓近辱過訪病中恨不歎奉人來枉手教具審起居  
佳勝至慰至慰旦夕中秋想復佳風月莫由陪接增悵  
仰也乍涼萬萬自重不宣

又

某啓人還奉書必達即候漸涼起居住否疊煩頤旨感  
昨交深未緣面謝惟祝若時自重不宣



又

某啓秋高氣爽伏計尊候清勝公宇已就想日有佳思  
未緣披奉萬萬以時珍璽不宣

又

某啓前日人回裁謝必達比日履茲薄冷起居佳否未  
緣展奉但有翹想尚冀保衛區區之至不宣

又

某啓近奉狀知入山未還即日想已還治起居佳否往

來衝冒然勝遊計不為勞也未瞻奉間更乞若時自重  
不宣

又

某啓辱書伏承起居佳勝示諭幼累已到城流寓中一  
喜然老穉紛紛口衆食貧向之孤寂未必不佳也可以  
一笑蒸鬱未解萬萬以時自重不宣

又

骨肉遠至重為左右費羊麴鱸魚已拜賜矣感忤之至

某啓從者往還見過皆不款奉愧仰何勝辱書承起居  
清勝聞還邑以來老稚鼓舞數日調治想服清暇矣歲  
莫萬萬加愛不宣

又

某啓昨日江干邂逅未盡所懷來日欲奉屈早膳庶少  
款曲闕人不獲躬詣不罪

與張朝請五首

某啓兄弟流落同造治下蒙不鄙遺眷待有加感服高

誼悚佩不已別來未幾思仰日深比來起居何如某已  
到瓊過海無虞皆託餘庇旦夕西去回望逾遠後會無  
期惟萬萬以時自重慰此區區途次裁謝草草不宣

又

海南風物與治下略相似至餘食物人烟蕭條之甚去  
海康遠矣到後杜門默坐喧寂一致也蒙差人津送極  
得力感感舍弟居止處若得蚤成令渠獲一定居遺物  
離人而遊於獨乃公之厚賜也兒子幹事未暇上狀不

罪某上啓

又

某再啓聞已有詔命甚慰輿議想旦夕登途也當別具賀幅某闕人寫啓狀止用手書乞加恕也子由荷存庇深矣不易一二言謝也新書海上嘯咏之餘有足樂者島中孤寂春色所不到也某再拜

又

某啓久不上狀想察其衰疾多畏非簡慢也新軍使來

捧教字且審比日起居住勝感慰兼極某到此數卧病  
今幸少間久逃空谷日就灰稿而已因書瞻望又復悵  
然尚冀若時自厚區區之餘意也不宣

又

新釀四壺開嘗如宿昔香味醇冽有京洛之風逐客何  
幸得此但舉杯屬影而已海錯亦珍絕此雖島外人不  
收此得之又一段奇事也眷意之厚感忤無已

答漢卿

某啓辱教承起居住勝為慰知不久入城遂當一見何  
幸如之地黃煎已領感忤適自局中還熟甚憑塞奉書  
地黃煎蒙寄惠極佳薑蜜之劑甚適宜也仰煩神用愧  
感不可言

東坡全集卷七十八



欽定四庫全書

東坡全集卷七十九

宋 蘇軾 撰

尺牘八十三首

謝呂龍圖三首

京師

龍圖閣老執事某西蜀之鄙人幼承家訓長知義  
方麤識名教遂堅晚節兩登進士舉一中茂材科  
故當世名公巨卿亦嘗賜其提挈愛憐之意故歐  
公引之於其始韓公薦之於其中今又閣下舉之

於其後自惟末學辱大賢者之知出自天幸然君子之心以公而取士其小人之志終貿恩以歸心但空省循何由論報比者上以片言隻字謝德於門下而其誠之所加意有所不能盡意之所至言有所不能宣故其見於筆舌者止此而已惟高明有以容而亮之

又

前以拙納上塵聽覽方懼獲罪於門下而無以容其誅

又辱荅教言辭款密禮遇優隆而褒揚之句有加於前  
日此不肖所以且喜且懼而莫知所措也珍函已捧受  
訖謹藏之於家以為子孫之美觀蔀屋之陋復生光彩  
陳根之朽再出英華乃閣下暖然之春有以嫗育成就  
之故也擇日齋沐再詣閣下臨紙澁納情不能宣伏惟  
恕其愚

又

某久以局事汨沒殊不獲觀止竊惟應得踈絕之罪於

左右不意寬仁含垢察其俗狀之常情恕其簡略之小過光降書辭曲加勞問拜貺之際益增厚顏旦夕詣賓次盛暑伏惟為朝廷自愛上副注倚之心下慰與人之望

與楊濟甫

為別忽已半歲傾想之懷遠而益甚即日起居何如貴眷各安不自離家至荆南數次奉書計並聞達前月半已至京一行無恙得臘月中所惠書甚慰遠意見在西

崗賃一宅子居住恐要知悉春暄未緣會見千萬珍重  
珍重

荅王龍圖

辱簡承孝履如宜新詩寵行甚幸但稱道太過非所以  
安不肖也餘所諭謹在意

與楊濟甫

鳳翔

奉別三更歲律思渴日深即日履此新春起居多勝貴  
聚各嘉安某前月十四日到鳳翔十五日已交割訖人

事紛紛久稽裁問想自尊君襄事後來漸獲閒靜營幹  
諸事必且濟辦某此與賤累如常今因范元歸奉書聞  
露氣候漸和更希珍重

與蒲城之六首

某啓聞軒馬已至多時而性懶作書不因使齋手教來  
雖有傾渴之心終不能致一字左右也悚愧悚愧盛熱  
殊不可過承起居佳裕甚喜甚喜某此並無恙京師得  
信亦安但近得山南書報伯母於六月十日傾背伯父

之喪未及一年而災禍仍重如此何以爲心家兄惟三哥  
在左右大哥二哥必取次一人歸山南謀扶匱還鄉也  
人生患難至有如此極者煩惱煩惱知郡事頗簡足以  
尋繹舊學也同僚中有可與相處而樂者否新收倖皆  
在此常相見恐知悉殘暑更冀順時珍重

又

近聞員秘丞言聞於誠之韓益州欲令誠之替某若得  
情固所喜幸也然某盡今歲方及二年不知朝廷肯令

其成資解去否若必俟三考則於誠之為太淹緩安用也向經由時甚恨不款曲令若因此得從容接奉何喜如之陳文日日見甚安

又

近遞中辱書方欲附問人來又承手教審聞起居住勝差慰瞻望新命必已下伏增欣慶苟相知豈必為交代但奉見稍遠耳承又須歸覲奔波良不易也秋冷千萬善愛



又

聞車騎已在二曲即見風采喜慰可知冒寒行李不易  
以此僻左獲奉清游幸甚也

又

今日比欲更接清話少頃而人事紛紛至今不得暫息  
欲奉謁次聞府官盡出接張省邁須至旦出城恐訝不  
來走此聞達

又

長安之別忽然改歲伏計履茲新春起居增慶某明日  
至府謁見預增欣忭然不免有少事干聒為本府帶得  
接新戎兵士數十人比謂到京却中途逢本官行李頗  
闕事欲告於貴府添差防護廂軍十餘人昨本有防護  
二十人為華州減却十人但只依元數亦差較也告早  
為擘畫某更不住後日絕早發去也恃眷契喋喋喧黷  
幸為留念

與楊濟甫

冬寒遠想起居住勝此去替不兩月更不能歸鄉且入  
京去逾遠依黯近得王道矩書云朝夕一來此相看告  
便如遞中惠一書貴知道矩幾日起發此幹告早及某  
只十二月十七八間離岐下也

荅楊濟甫二首

除喪還朝

某近領臘下教墨感服眷厚兼審起居佳勝某此與賤  
累如常舍弟差入貢院更半月可出都下春色已盛但  
塊然獨處無與為樂所居廳前有小花圃課童種菜亦

少有佳趣傍宜秋門皆高槐古柳一似山居頗便野性也漸暖惟千萬珍重

又

遞中屢得數書知尊體佳勝貴眷欠安示及發遞引自契勘得並到但鄉親書皆五六十日不獨濟甫也府推之命只是暫權發遣更月餘正官到即仍舊管官誥院也府中冗絆非拙者所樂恐知都下所須示及

與楊濟甫

近領來書喜知眠食佳安某此與賤累皆安陳州舍弟  
並安不煩念及久客都下桂玉所迫囊裝並竭今冬積  
雪四五尺僦居弊陋殊無聊惟日望一差遣出去耳未  
由披奉千萬珍重

答寶月大師二首

久不奉書蓋冗情相因必未訝也史厚秀才及蔡子華  
處領來書知法體佳勝此中並安請補外蒙恩除杭倅  
旦夕出京且往陳州相聚至九月初方行逾遠鄉里曷

勝依黯累示及瑜隆紫衣師號近為干得王詵駙馬奏  
瑜為海慧大師文字更旬日方出圓覺經云法界海慧  
照了諸相文潞公亦許奏隆紫衣然須俟來年遇聖節  
方可奏已差祠部吏人到王附馬宅計會瑜師文字纔  
得便入遞次莫更一兩月方得勅出此事自難得偶成  
此二事也臨行草草書不盡此懷惟千萬珍重

又

屢蒙寄紙一一愧荷附馬都尉王晉卿畫山水寒林冠

絕一時非畫工能髣髴得一古松帳子奉寄非吾兄別  
識不寄去也幸秘藏之亦使蜀中工者見長意思也他  
甚珍惜不妄與人

與大覺禪師璉公 杭倅

人至辱書伏承法候安裕傾向傾向昨奉聞欲捨禪月  
羅漢非有他也先君愛此畫私心以為捨施莫如捨所  
甚愛而先君所與厚善者莫如公又此畫頗似靈異累  
有所覺於夢寐不欲盡設嫌涉怪爾以此益不欲於俗

家收藏意只如此而來書乃見疑欲換金水羅漢開書  
不覺失笑近世士風薄惡動有可疑不謂世外之人猶  
復爾也請勿復談此某比乏人可令齋卡兵卒之類又  
不足分付告吾師差一謹幹小師齋籠仗來迎取并古  
佛一軸亦同捨也錢塘景物樂之忘歸舍弟今自陳州  
得替當受東南幕官冬初恐到此亦未甚的詩筆計益  
老健或借得數首一觀良幸到此亦有拙惡百十首閒  
暇當錄寄也



答范夢得二首

久以事牽不遑奉書深以為愧中間安上處及遞中捧  
來教具審起居佳勝某旅宦粗遣春夏間殊少事近日  
併覺冗至盜賊獄訟常滿蓋新法方行故也疲繭無狀  
館中清佚至為福地然知平日交游皆不在何以為樂  
某旬日來被差本州監試得閒二十餘日在中和堂望  
海樓閒坐漸覺快適有詩數首寄去以發一笑

又

久不奉書愧負不可言不審比辰起居佳否某此粗遣  
但親友踈濶旅懷牢落爾屢得蜀公書知佳健二家兄  
書云每去輒留食食倍於我輩此大慶也頻得潞公手  
筆皆詳悉精好富公必時見之聞其似四十許人信否  
君實固甚清安得此數公無恙差慰人意無緣言面惟  
順時自愛

與郭功父五首

昨日承顧訪殊慰久濶經夕起居佳否某出院本欲往

見以下痢乏力未果想未訝也略奉啓布謝萬一

又

元本闕四字

瞻奉喜慰可量既以不出又數日卧病遂

元本闕五字

起居住否某下痢雖止尚羸薊也謹奉啓

布謝

又

兒子歸來別無可為土物御筆一雙賜墨一圭新茶兩  
餅皆得之大臣家真物也不罪免瀆

又

辱訪臨感忤獨以忽遽為恨迫行不往謝惟寬恕乍熱  
萬萬自重不宣

又

別來瞻仰無窮風雪凝寒從者勤矣辱書承起居甚佳  
為使者即至必且暫還惟萬萬自重

與康公操都管三首

某稔聞才業之美尚淹擢用向承非罪被移衆論可怪

賢者處之想恬適也希聲久不得書承示諭方知得蜀  
州應甚慰意二浙處處佳山水守官殊可樂鄉人之至  
此者絕少舉目無親故而杭又多事時投餘隙輒出訪  
覽亦自可卒歲也東陽自昔勝處見劉夢得有三伏生  
秋之句此境猶在否未知會晤之日但有企咏

又

所索詩非敢以淺陋為辭但希世絕境衆賢所共詠嘆  
不敢草草為寄也幸恕察

又

向辱教久欲裁謝值出入紛紛無定因循至今即日履  
茲春和起居佳適向承寄示圖記及時實深慰仰此真  
得賢者之樂雖鄙拙亦欲勉作歌詩庶幾附託高人絕  
境以傳永久適會紛紛未暇更旬日當寄上也

答楊君素

久不奉書遞中領來教欣承起居佳勝眷愛各無恙奉  
別忽四年薄廩維絀歸計未成懷想親舊可勝惋嘆吾

丈優游自得心恬體舒必享龜鶴之壽劣姪與時齟齬  
終當捨去相從林下也

與楊濟甫

久不奉書亦少領來信思念不去心不審即日起居佳  
勝眷愛各無恙某此安健官滿本欲還鄉又為舍弟在  
京東不忍連年與之遠別已乞得密州風土事體皆佳  
又得與齊州相近可以時得治牒相見私願任便之但  
歸期又須更數年瞻望墳墓懷想親舊不覺潛然未緣

會面惟冀順時自重

與周開祖

某忝命皆出獎借尋自杭至吳興見公擇而元素子野  
孝叔令舉皆在湖燕集甚盛深以開祖不在坐為恨別  
後每到佳山水處未嘗不懷想談笑出京北去風俗既  
推魯而游從詩酒如開祖者豈可復得乃知向者之樂  
不可得而繼也令舉特來錢塘相別遂見送至湖久在  
吳中別去真作數日惡然詩人不在大家省得三五十



首唱酬亦非細事

與何浩然

人還辱書且喜起居佳勝寫真奇妙見者皆言十分形  
神甚奪真也非故人倍常用意何以及此感服之至所  
要詩稍暇作寫去雙幅已令蜀中織造至便寄納未即  
會見千萬珍重

答水陸通長老五首

密州

近過蘇臺不得一見而別深為耿耿專人來辱書且喜

法履清勝某到此旬日郡僻事少足養衰拙然城中無山水寺宇朴陋僧簾野復求蘇杭湖山之遊無復髣髴矣何日會集慰此牢落惟萬萬自重

又

三瑞堂詩已作了納去惡詩竟何用是家求之如此其切不敢不作也惠及溫柑甚奇此中未嘗識也棗子兩簍不足為報但此中所有只此耳單君貺必常相見路中屢有書去久望來書且請附密州遞寄數字告為速

達此意

又

別後一向冗忙有疎奉問疊辱手教愧悚良深仍審履  
茲初涼法體增勝為慰承開堂未幾學者日增吾師久  
安閒獨迫於衆意無乃少勞然以濟物為心應不計勞  
逸也未緣會合千萬珍重人還布謝

又

姚君篤善好事其意極可佳然不須以物見遺也惠香

十八罐却託還之已領其厚意與收留無異實為他相識所惠皆不留故也切為多致此懇

又

且說與姚君勿疑訝只為自來不受非親舊之餽恐他人却見怪也元伯昆仲因見各為致懇乍到未及奉書

答陳履常二首

吳中屢得瞻見時以餘棄洗濯蒙鄙別來仰佇日深遞中首辱教尺感服良厚即日履茲酷暑起居何如貴眷

令子各佳勝披奉杳然臨紙悵惘惟冀為時調護

又

遠承寄貺詩刻讀之灑然如聞玉音何幸獲此榮觀不  
獨以見作者之格且足以知風政之多暇而高躅之難  
繼也輒和光祿菴二絕聊以寄欽羨之懷一笑投之可  
也所須接骨丹方謹錄呈高密連年旱蝗應副朔方百  
須紛然疲蕭日俟汰逐企仰仙館如在雲漢矣因風不

客誨字

答程彛仲二首

某啓奉別積年因循不修書問每以為愧遽中辱手書  
勞問甚厚感戴不可言也承以科詔入都跋履之餘起  
居佳否老兄循道既久文行逾粹決無終否不振之理  
更少貶以就繩墨即當俯拾也未緣披奉惟冀以時自  
重謹因鄉人李君行奉啓布問

又

得聖此行得失必且西歸計無緣過我而東武任滿當

在來歲冬杪亦無緣及見於京師矣此任滿日舍弟亦  
解罷當求鄉里一任與之西還近制既得連任蜀中遂  
可歸老守死墳墓也心貌衰老不復往日惟念斗酒隻  
雞與親舊相從耳星橋別業比來更增葺否因便無惜  
一兩字

與王慶源二首

陵州遞中辱書及詩如接風論忽不知萬里之遠也即  
日履茲秋暑尊候何似某此粗遣雖有江山風物之美

而新法嚴密風波險惡况味如不佳退之所謂居閒食不足從官力難任兩事皆害性一生常苦心正此謂矣知叔丈年來頗窘此事有定分但兄以安健無事多子孫為樂亦可自遣何時歸休得相從田里但言此心已馳於瑞草橋之西南矣秋暑更冀以時珍重

又

高密風土食物稍佳但省租公庫減削索然貧儉始至值歲饑人豪剽劫無虛日凡督捕姦兇五七十人近始



肅然鬪訟頗簡稍葺治園亭居之亦粗可樂但時登高  
西南引領即悵然終日近稍能飲酒終日可飲十五銀  
盞他日粗可奉陪於瑞草橋路上放歌倒載也

答金山寶覺禪師

去歲赴官迫於程限不能枉舟一別中流縱望雲山杳  
然有不可及之歎既渡江遂蒙輕舟見餞復得笑語一  
餉之樂暫荷之懷殆不可勝言別來因循未及修書專  
人至辱教累幅慰喻反覆讀之爽然如對妙論仍審比

來法履佳勝其此粗遣但未有會見之期臨紙惘然惟  
萬萬自重至游堂記即當下筆遞中寄去近有後杞菊  
賦一首寫寄以當一笑

荅富道人

承錄示秘方及寄遺藥具感厚意然此事本林下無以  
遣日聊用適意可也若待以為生則為造物者所惡矣  
僕方苟祿出仕豈暇為此謹却馳納且寄之左右異日  
歸田却咨請感愧之至

答周開祖

通中辱書教累幅如接笑語即日遠想起居住勝某此  
無恙已被旨移河中府候替人十二月上旬中行想去  
益遠矣往日相從湖山之景何緣復有別後百事紛紛  
皆不足道惟令舉逝去令人不復有意於茲世細思此  
公所以不壽者而不可得不免為之出涕讀所示記文  
述略盡其美甚善其家能入石否亦欲作一首哀詞未  
暇也當作寄去開祖筆力頗長魏武所謂老而能學惟

予與袁伯業真難得也寄示山圖欲尋善本而不可得者新詩清絕輒和兩首取笑浩然亭欲續和寄去今日大雪與客飲於玉山堂適遣人往舍弟處遂作此書手冷殊不成字惟冀自重而已

答蜀僧幾演

幾演大士蒙惠蟠龍集向已盡讀數冊迺詩迺文筆力奇健深增嘆服僕嘗觀貫休齊己詩尤多凡陋而遇知得名赫奕如此蓋時文凋弊故使此二僧為雄強今吾

師老於吟咏精敏豪放而汨沒流俗豈亦有幸不幸耶  
然此道固亦澹泊寂寞非以靳人知而鼓譽也但鳴一  
代之風雅而已既承厚貺聊奉廣耳

與人

違去門下已八年愚魯罷殆人事廢書疏缺然怠慢之  
罪宜在譴絕比承柄用又不以時隨衆修賀蓋疎懶愧  
縮日復一日不知復憐恕之否即日履茲寒凝台候萬  
福某去替止數月而貧困難以赴闕相次乞江浙一郡

君幸得之拜見未可期惟冀為國自重

答張主簿

改歲無緣展慶伏惟履茲新春百福來集旬日前辱教  
感服眷厚不即馳答悚忤悚忤向日披奉但有馳仰餘  
寒冀以時自重

與人二首

浙右之別遂不上問至今想必察其情也特枉書問感  
慰兼集比日起居何如涉海恬然繼以題擢衆論翕然

知忠信之可恃名實之相副也雅故之末忻慰可量

又

前日使車道由郡下雖展接顏表殊慰瞻徠之懷惟是  
禮勞不腆實深愧悚逮茲達間吏役絆撻未皇奉書以  
伸繾綣之情特蒙高明遠貺珍牘披繹數四感仰交懷  
初暑微熱竊承跋履之餘動止佳勝未緣會集臨紙增

慨

與梅守黎希聲三首

徐州

傾向已久展奉無由竊計比日履茲酷暑起居佳勝某  
占籍部中不獲俯伏門下一修桑梓之儀瞻望鈴齋豈  
勝懷仰伏順時為民自愛

又

去歲王秀才西歸奉狀必達即日遠想起居住勝承朝  
廷俯徇民欲有旨借留雖滯留高步士論未厭而鄉閭  
之慶特以自私而已然山水之秀園亭之勝士人之衆  
多食物之便美計公亦自樂之忘歸也某久去墳墓貪



祿忘家念之輒面熟但差使南北不敢自擇爾何時復  
得一笑為樂尚冀為時自重

又

向自密將赴河中至陳橋受命改差彭城便欲赴任以  
兒子娶婦暫留城東景仁園中旦夕自汴東去逾遠風  
間可勝悵然墳墓每煩戒敕惟增感噎堂兄欲葬祖墳  
為諸房衆多某既不敢果決恐衆意難允也乞知之

答李秀才元

熱甚竟不再別悵仰殊深辱教承起居佳勝寵惠皆竒  
筆雅制刻荷無已仁者之惠誠足慰彼黎庶然不知者  
以為見教以是搖之呵呵安道舍弟當具道盛意乍遠  
萬乞保重即復顯用以慰士望

答范蜀公

前日辱書并新詩累幅詞格清美欽味不釋手屬使者  
交至紛紛無暇裁答後時再領手教愧悚無地比日起  
居何如未由披奉萬萬以時自重

答晁叔美二首

自別兩辱存問荷眷契之厚無以為喻日欲裁謝而拙  
鈍懶放因循至今計明哲雅量不深譴過而自訟亦久  
矣即日不審尊履何如某此無恙但奉行新政多不如  
法勘劾相尋日埃汰譴耳若得放歸過淮必遂候見未  
間為國自重

又

向承出按淮甸不即具賀幅者以吾兄素性亮直而此

職多有可愧者計非所樂耳然仁者於此時力行寬大之政少舒吏民於網羅中亦所益不小此中常賦之外徵歛雜出而鹽禁繁密急於兵火民既無告吏亦僅且免罪益苟簡矣向聞吾兄議論頗與時輩不合今茲躬履其事必有可觀者矣令兄佳士久淹諸君亦自知之

與蒲廷淵

河中永洛出棗道家所貴事見真誥唐有道士侯道華嘗得無核者三食之後竟竊鄧太主藥上昇君到彼試

求之但恐得之不偶然非力求所能致耳

與晁君成

苦寒審尊履佳勝新文極為精妙久不見之甚慰喜莊  
子用志不分乃疑於神古語以疑為似耳如易陰疑於  
陽世俗不知乃改作凝不敢不告人還草草

與范子豐六首

伏審子豐南宮殊健慶抃可量即日想已唱第必在高  
等期集之暇起居佳勝某更五七日泝汴愈遠左右臨

書悵然惟祈慎重別膺亨寵

又

小事拜聞欲乞東南一郡聞四明明年四月成資尚未  
除人託為問看回書一報前所託殊不蒙留意恐非久  
東南遂請逾難望矣無乃求備之過乎然亦慎不可汎  
愛輕取也人還且略示諭

又

近專人奉狀達否即日起居何如貴眷各安局事漸清

簡否某幸無恙水旱相繼流亡盜賊並起決口未塞河水  
日增勞苦紛紛何時定乎近乞四明不知可得否不爾  
但得江淮間一小郡皆所樂更不敢有擇也子豐能為  
一言於諸公間乎試留意人還仍乞一報幸甚未見無  
期惟萬萬以時自重

又

稍不通問伏想起居佳勝侍郎丈必在郊外過夏台候  
必更康安某此與幻累如常八月九月間秋水既過彭

城城下微備高麗使已還四明可以易守當更理前請  
也會合者未有涯萬萬自重

又

南方夏熱殊非中原之比入秋稍得清涼然夏田旱損  
七八鹽法更變課入不登雖閒局不免以此為累自餘  
靡如常也子中子老頃在左右今已赴官未何時參候  
北望不勝馳情

又



新珠想日長進愛壻無恙甚望丈人高等待乞利市也  
納銀一笏託用買圓熟珠子二千枚少錢告那出便納  
上婚嫁所須不可奈何甚非情願幸留意承問似叔頗  
長成每日作詩讀史但蒙拙少訓督耳內孫想亦聰淑  
諸郎娘亦計安也

答王慶源

久以官冗不暇奉問忽辱手訊喜知車從已達輦下起  
居佳勝即日南宮必榜出矣淪屈已久必遂了當欣荷

良深來書謙抑過當四方赴者甚衆豈獨吾叔元昆勸  
駕良合事宜恨此拘繫無緣於東華門外奉接京師一  
別二十餘年豈惟吾儕衰老可嘆至於都城風物事體  
索然無復往時矣東南守官極可樂而民間蹙迫不聊  
生懷抱殊不佳深願慶源了當後千萬一來相從數月  
少慰平生幸勿以他事為辭至懇至懇

與參寥

別來思企不可言每至逍遙堂未嘗不悵然也為書勤

勤不忘如此仍審比來法體康佳感服兼至三詩皆清  
妙讀之不釋手且和一篇為答所要真贄尚未作來人  
又不敢久留甚愧知且伴太虛為湯泉之遊甚善甚善  
某開春乞江浙一郡候見去處當以書奉約也要墨納  
兩笏皆品佳也餘惟為法自重適有數客遠來相看陪  
接少暇奉啓不盡意

與文與可三首

與可抱才不試道道彌久尚未聞大用公議不厭計當

在卽然廊廟間誰為卹公議者乎老兄既不計較但乍失為郡之樂而有桂玉之困又却不見使者嘴面得失相乘除亦略相當也彭門無事甚可樂但未知今夏得免水患否子由頻得書甚安示諭秋冬過親甚幸甚幸令嗣昆仲各計安勝為學想皆成就矣

又

離浙中已四年向亦有少浙物久已分散零落矣有藥王船兩隻獻上恰好吻酌不通客矣呵呵杭州故人頗

多致之不難當續營之但恐得後不肯將盛作見借也

又

近屢於相識處見與可近作墨竹惟劣弟只得一竿未  
說字說潤筆只到處作記作贊備員火下亦合剩得幾  
紙專令此人去請幸毋久秘不爾不惟到處亂畫題云  
與可筆亦當執所惠絕句過狀索二百五十足也呵呵

與鮮于子駿三首

久不奉狀方深愧悚遙中伏辱手教并新文石刻等疾

讀善快無量即辰起居佳否公文學德度宜在朝廷久  
此外遠何也然聞一路蒙被仁政不爾吏民皆在倒懸  
中也况鄉井墳墓在焉計居之甚以為樂某到郡正一  
年諸况粗遣歲凶民貧力所無如之何者多矣然在己者  
未嘗敢行所愧也如此而已忝厚眷故及末緣瞻奉惟  
冀以時自重不宣

又

忝厚眷不敢用啓狀必不深訝所惠詩文皆蕭然有遠

古風味然此風之亡也久矣欲以求合世俗之耳目則  
踈矣但時獨於閒處開看未嘗以示人蓋知愛之者絕  
少也所索拙詩豈敢措手然不可不作特未暇耳近作  
小詞雖無柳七郎風味亦自是一家呵呵數日前獵於  
郊外所獲頗多作得一闕令東州壯士抵掌頓足而歌  
之吹笛擊鼓以為節頗壯觀也寫呈取笑

又

故人劉格字道純故友劉恕道原之親弟讀書強記辨

博文詞粲然可觀而立節強鯁吏事亦健君實頗知之  
餘人未識也欲告子駿與一差遣收置門下公若可以  
踏逐辟召幸先之敢保稱職也旦夕歸南康軍待闕公  
若有以處之他必願就也某非私之也為時惜才也

與何正道教授三首

一作何  
正通

忝命假手出於獎比禮當詣謝以衰疾疲曳不給於力  
愧悚無已乍熟起居佳勝登舟遽迫不果造別益增仰  
戀



又

辱書承起居住勝鄉校淹留然使徐之士子識文章瑰  
瑋之氣非小補也某又復西上紛紛無補甚愧朋友矣

又

張聖途來稍聞動止為慰退之所難乃今見之大匠旁  
觀愧汗深矣行役匆匆不盡區區

與歐陽仲純五首

去歲城東屢獲陪從蒙益既多樂亦無量既別日苦賤

事不克馳問慙負不可言即日起居何如見報除審簿  
信否殊不知即日從者所在徒有仰詠某蒙庇粗遣彭  
門本無一事足以藏拙河水一至事無不有中間幾殆  
者數矣必亦聞之今方稍安而夏秋之患未可量蓋命  
窮所至感召此何時復得一笑之樂也近詩數首聊以  
破顏餘寒萬萬以時自重

又

伯仲叔弼昆仲各計安勝楊掾行速未及拜書乞道下

懇子由在南都時得書無恙彭城最處下流水患甲於  
東北奏乞錢與夫為夏秋之備數章皆不報曹河若可  
塞固大善不爾倉卒之間不免調急夫使係省錢豈暇  
復稟命乎所費必多而為備不如先事之精也人微言  
輕信命而已仲純知我之深者聊復及之

又

去春寄舍國門屢辱臨顧喜慰無量別來逾年奔走俗  
狀未嘗通問瞻企徒深即日履此煩暑起居何如眷愛

各安否傳聞車馬已到宛丘相去甚近書問自此可時  
相及矣千萬順時珍重


又

崔度者頃年在陳與之甚熟今作過海之行妻子仍在  
陳學章略與垂顧

又

伯仲兄聞監西岸已視事未叔弼近託孫元忠附書季  
默令安在因風無惜惠問宛丘誰與往還可有與語者

否



東坡全集卷七十九

欽定四庫全書

集部

東坡全集卷八十一

詳校官庶吉士臣謝恭銘

檢討臣何思鈞覆勘

總校官編修臣王燕緒

校對官中書臣高申

謄錄監生臣許思光

欽定四庫全書

東坡全集卷八十

宋 蘇軾 撰

尺牘七十九首

答周開祖二首

久別思渴不言可知一路候問來耗忽辱教喜慰良深  
乍寒起居佳勝承脫湖北之行而得樂清正如舍魚而  
取能掌甚可賀也某忝命甚便其私即遂面話此不盡  
懷



又

長篇奇妙無狀每蒙存錄如此之厚但賜多而報寡故人知其慙拙必不罪也今輒和一首少謝不敏且資一笑惠及海味珍感來人遽還未有以報但愧忤無窮到郡不見令舉此恨何極嘗冀其殯不覺一慟有刻石必見之更不錄呈有幹一一示及李無悔近見訪留此旬餘亦許秋涼再過也

答呂熙道二首

平時企詠賢者獨恨隔閼耳既至治下謂當朝夕繼見  
而病與人事奪之又迫於行忽遽捨去可勝嘆耶別來  
方欲上問先辱手教益增悚忤比日起居何如後會不  
可期惟萬萬以時自重

又

南都住半月恍然如一夢耳思企德義每以悵然舍弟  
朴訥寡徒非長者輕勢重道誰肯相厚者湖州江山  
風物不類人間加以事少睡足真拙者之慶有幹不

外

答范純夫

向者深望軒從一來而還領手教知徑赴治實增悵惘  
比日起居住勝日對五老想有佳思此間湖山信美而  
衰病不堪煩但有歸蜀之興耳未由會集千萬以時自  
愛

與道甫

昨日特蒙不外鄙拙袖出盛文相示辭瞻格老覽之令

人疊疊忘倦非大手筆未及至此受教良多不敢擅為  
巾笥之藏謹令人歸納文府伏乞視至未審從人何日  
成行亦須示諭

與孫子思七首

奉別未幾思企已深比日起居住勝聞軒從及境即遂  
披對豈勝慰喜

又

事冗有疎上謁思企之深不審起居住佳否來日輒邀從

者同憲車議少事本欲躬詣為公擇見訪不果幸賜臨  
顧

又

屢辱垂訪尚稽走謁經宿起居住否借示諸刻一清心  
目又足見雅尚之不允也謹却馳納

又

過辱枉顧知事務冗迫不敢久留語紙軸納去餘空紙  
兩幅留與五百年後人跋尾也呵呵耘叟詩亦佳

又

疊辱車騎往謝甚疎惟故人深照不以為譴也經宿尊  
候佳勝書四紙并藥方馳上須面授其秘也并硯不一

一

又

近辱軒從雖屢接奉既別思仰無窮人事衮衮未遑上  
問先枉寵訊伏審起居佳勝感慰兼深仲通來知在府  
中計與子由輩游從甚樂末緣再會惟萬萬以時自重

又

比來新詩必多無緣借觀豈勝渴仰示諭諸公處敢不出力但恐言輕不能有益耳

與程得勝秘校二首

近省榜到郡首承高過歡慰可量沉困累年行業充富鄉曲榮耀交游喜快甚休甚休春風暄和奉計即日起居安勝御試必更在上等盤桓都下為況何如惟順時珍愛

又

某去秋因鄉人自高密過此託致手書不知達否奉違  
累歲無緣一接談笑傾仰殊甚榜中鄉人所識惟吾兄  
一人其餘豈盡新俊耶車馬必稍留都下因風無惜惠  
問

與人

託庇隣封每荷存記特辱榮訊愧汗可量即日履茲霜  
候起居佳勝未緣參見惟日瞻企尚冀以時珍衛區區



與樂推官

黃州

疊辱臨訪欲少款奉多事因循繼以卧病愧負深矣數  
日起居佳否知明日啓行無緣面別尚冀保練慰此區  
區

答李昭玘

無便久不奉書王子中來且出所惠書益知動止之詳  
為慰無量比日尊體何如既拜賜雪堂新詩又獲觀負  
日軒諸詩文耳目眩駭不能窺其淺深矣老病廢學已

久而此心猶在觀足下新製及魯直無咎明略等諸人  
唱和於拙者便可格筆不復措辭近有李豸者陽翟人  
雖狂氣未除而筆墨瀾翻已有漂沙走石之勢嘗識之  
否子中殊少進皆左右之賜也何時一笑未間惟萬萬  
自重

答范蜀公四首

李成伯長官至辱書承起居住勝甚慰馳仰新居已成  
池圃勝絕朋舊子舍皆在人間之樂復有過此者乎某

九百粗遣春夏間多瘡惠及赤目杜門謝客而傳者遂云物故以為左右憂聞李長官說以為一笑平生所得毀譽殆皆此類也何時獲奉几杖臨書惘惘

又

蒙示諭欲為卜隣此平生之至願也寄身函丈之側旦夕聞道又况忝姻戚之末而風物之美足以終老幸甚幸甚但囊中止有數百千已令兒子持往荆渚買一小莊子矣恨聞命之後然京師尚有少房縉若果許為指

揮從者幹當賣此業可得八百餘千不識可納左右否  
所賜手書小字如芒知公目益明此大慶也某早衰多  
病近日亦能屏去百事澹泊自持亦便佳健異日必能  
陪從也

又

承別紙示諭麴蘖有毒平地生出醉鄉土偶作祟眼前  
妄見佛國公欲哀而救之問所以救者小子何人固不  
敢不對公方立仁義以為城池操詩書以為干楯則舟

中之人盡為敵國雖公盛德小子亦未知勝負所在願  
公宴坐靜室常作是念當觀彼能惑之性安所從生又  
觀公欲救之心作何形段此猶不立彼復何依雖黃面  
瞿曇亦須斂衽而況學之者耶聊復信筆以發公千里  
一笑而已

又

顧仆罪戾世所鄙遠而丈人獨收錄欲令撰先府君墓  
碑至為榮幸復何可否之間而不肖平生不作墓誌及

碑者非特執守私意蓋有先戒也反覆計慮愧汗而已  
仁明洞照必深識其意所賜五體書謹為子孫之藏幸  
甚幸甚無緣躬伏門下道所以然者皇恐之至

答言上人

去歲吳興倉卒為別至今耿耿譴居窮陋往還斷盡遠  
辱不遺尺書見及感忤殊深比日法體佳勝扎翰愈精  
健詩必稱是不蒙見示何也雪齋清境發於夢想此間  
但有荒山大江修竹古木每飲村酒醉後曳杖放脚不

知遠近亦曠然天真與武林舊遊未見議優劣也何時  
會合一笑惟萬萬自愛

答通禪師

謫居窮僻懶且無便書問曠絕故人不遺兩辱手教具  
審比來法體甚輕安感慰深至僕晚聞道照物不明陷  
於吏議愧我道友所幸聖恩寬大不即誅殛想亦大善  
知識法力冥助也祿廩既絕困而布衣蔬食於窮苦寂  
淡之中却粗有所得未必不是晚節微福兩書開諭周

至常置座右也未緣展謁萬萬以時自重

答道源秘校

謫居窮陋首見故人釋然無復有流落之歎衰病奇拙  
所向累人自非卓然獨見不以進退為意者誰肯辱與  
往還每惟此意何時可忘別來又復初夏思企不可言  
遠想即日尊候佳勝兩辱手書懶不即答計已獲罪左  
右然惟故人能知其性氣蓋懶作書者有素中實無他  
也更望寬之知到官又復對換想高懷處之無適而不



可江令竟不肯少留健決非庸人所及也無由面見以時自重

與王慶源

竄逐以來日欲作書為問舊既懶惰加以閒廢百事不舉但慙忤而已即日體中何如眷愛各佳某幼累並安但初到此喪一老乳母七十二矣悼念久之近亦不復置懷寓居官亭俯迫大江几席之下雲濤接天扁舟草履放浪山水間客至多辭以不在往來書疏如山不復

答也此味甚佳生來未嘗有此適知之免憂近文郎行  
寄紙筆與叢郎到甚遲也未緣會面惟萬萬自愛

答李寺丞二首

久別渴詠述中辱書且審起居清勝至慰至慰某謫居  
粗遣廢棄之人每自嫌鄙況於他人君獨收卹有加平  
素風義之厚足以愧激頽靡也未緣會見萬萬以時自  
愛

又

遠蒙分輟清俸二千極愧厚意然長者清貧僕所知也  
此不敢請又重違至意輒請至年終來春即納上感愧  
不可言也僕雖遭憂患狼狽然正如當初不及第即諸  
事易了荷憂念之深故以解懸慮

與陳季常九首

近因往螺師店看田既至境上潘尉與龐醫來相會因  
視臂腫云非風氣乃藥石毒也非鍼去之恐作瘡乃已  
遂相率往麻橋龐家住數日鍼療尋如其言得愈矣歸

家領所惠書及藥併荷憂愛之深至仍審比來起居住  
安曾青老翁須傳燈錄皆已領一一感佩五代史亦收  
得所看田乃不甚佳且罷之蘄水溪山乃爾秀邃耶龐  
醫熟接之乃奇士知新屋近撰本草爾雅謂一物而見  
多名也見  
劉頌具說深欲走觀近得公擇書云四月中乃到此想  
季常未遽北行當與之偕往耳非以太守處借人遣齋  
家傳去別細奉書

又

柴炭已領感忤感忤東坡昨日立木殊耽耽也

又

王家人力來及專人并獲二緘及承雄篇贊詠異夢證  
成仙果甚喜幸也某雖竊食靈芝而君為國鑄造藥力  
縱在君前陰功必在君後也呵呵但累書聽流言以誣  
平人不得無所損也懸弧之日請一書示諭當作賀詩  
切祝切祝比日起居住否何日決可一游郡城企望日  
深矣臨臯雖有一室可憇從者但西日可畏承天極相

近或門前一大舸亦可居到後相度未間萬萬以時自重

又

欲借易家文字及史記索隱正義如許告季長為帶來季常未嘗為王公屈今乃特欲為我入州州中士大夫聞之聳然使不肖增重矣不知果能命駕否春甕但不惜不須更為恨也

又

鄭巡檢到領手誨具審到家尊履康勝羈孤結戀之懷  
至今未平也數日前率然與道源過江游寒溪西山奇  
勝殆過於所聞獨以坐無狂先生為深憾耳呵呵示諭  
武昌田曲盡利害非老成人吾豈得聞此送還人諸物  
已領易義須更半年功夫練之乃可出想秋末相見必  
得拜呈也近得李長吉二詩錄去幸秘之目疾必已差  
茂木清陰自可愈此餘惟萬萬順時自重

又

示諭武昌一策不勞營為坐減半費此真上策也然某  
所慮又恐好事君子便加粉飾云擅去安置所而居於  
別路傳聞京師非細事也雖復往來無常然多言何所  
不至若大需之後恩旨稍寬或可圖此更希為深慮之  
仍且密之為上

又

稍不奉書渴仰殊深辱書承起居住佳勝新居漸畢工甚  
慰想望數日得君字韻詩茫然不知醉中拜書道何等



語也老媳婦云一絕乞秀英君大為愧悚真所謂醉時是醒時語也蒙不深罪甚幸雖知來篇非實語猶且收執庶幾萬一莫更要寫脊記否呵呵柳簿云某奉訝者不知得之於誰安有此理來書雄冠之語亦無人見但有答柳二書云陳季常要寫脊記欲與寫云文武家寮常居祿位亦如與季常書作戲耳何名為訝哉想公必不以介意不答最妙日夜望季常入州但可惜公擇將至若不爭數日而吾三人者不一相聚劇飲數日為可

惜耳有人往舒五七日必回可見其的若不來續以書  
布聞茶臼更留作樣幾日近日新聞甚多篇篇皆奇遲  
公來此口以傳授餘惟萬萬自愛

又

疊辱來貺且喜尊體已全康復然不受盡言遂欲聞公  
何也公養生之效歲有成績今又示病彌月雖使臯陶  
聽之未易平反公之養生正如小子之圓覺可謂害脚  
法師鸚鵡禪五通氣毬黃門妾也至禱

又

孫巨源之姪甚佳士兼甚仰盛德云當去請見某告以  
季常不蓄烏巾十餘年矣又不欲便裹帽奉謁他必自  
去見公也鎮中得一好官人亦非細事叔亶書已附去  
西方多事此君却了得莫遂奮起否見報趙二罷相州  
取勘他稱病乞不下獄不知為何事私甚憂之公聞其  
詳否又報舒亶乞郡閒知之

答吳子野四首

濟南境上為別便至今矣其間何所不有置之不足道也專人來忽得書且喜居鄉安穩尊體康健某到黃已一年半處窮約故是宿昔所能比來又加便習自惟罪大罰輕餘生所得君父之賜也躬耕漁樵真其餘樂承故人千里問訊憂卹之深故詳言之何時會合臨紙惘惘

又

承三年廬墓英事誠盡又以餘力葺治園亭教養子弟此皆古人之事業所望於子野也復覽諸公詩文益增

愧歎介夫素不識之筆力乃爾奇逸耶僕所恨近日不復作詩文無緣少述高致但夢想其處而已子由不住得書無恙寄示墓誌及諸刻珍感虞直講一帖不類近世筆迹可愛可愛近日始解畏口慎事雖已遲猶勝不悛也奉寄書簡且告勿入石至懇至懇某再拜

又

寄惠建茗數品皆佳絕彼土自難得更蒙輟惠慙悚慚悚沙魚赤鯉皆珍物感忤不可言扶劣膏不識其為何

物但珍藏之莫測所用因書章詳以示諭也近有李明  
者畫山水新有名頗用墨不俗輒求得一橫卷頗長可  
用木牀繞屏附來人納上江郡乃無一物為回信慚悚  
之至兒子無恙承問及

又

每念李六丈之死使人不復有處世意復一覽其詩為  
涕下也黃州風物可樂供家之物亦易致所居江上俯  
臨斷岸几席之下即是風濤掀天對岸即武昌諸山時

時扁舟獨往若子野北行能迂路一兩程即可相見也

與李公擇二首

知治行窘用不易僕行年五十始知作活大要是慳爾  
而文以美名謂之儉素然吾儕為之則不類俗人真可  
謂淡而有味者又詩云不戢不難受福不那口體之欲  
何窮之有每加節儉亦是惜福延壽之道此似鄙吝且  
出之不得已也然自謂長策不敢獨用故獻之左右佳  
京師尤宜用此策也一笑

又

示及新詩皆有遠別惘然之意雖兄之愛我厚然僕本  
以鐵心石腸待公何乃爾耶吾儕雖老且窮而道理貫  
心肝忠義填骨髓直須談笑死生之際若見僕困窮便  
相憐則與不學道者大不相遠矣兄造道深中必不爾  
出於相愛好之篤而已然朋友之義專務規諫輒以狂  
言廣兄之意爾雖懷坎壈於時遇事有可尊主澤民者  
便忘軀為之禍福得喪付與造物非兄僕豈發此看訖



便火之不知者以為詬病也

答湖守刁景純二首

因循不奉書不覺歲月乃爾久耶過辱不遺遠賜存問  
感激不可言也比日竊惟鎮撫多暇起居勝常吳興風  
物夢想見之嘯咏之樂恨不得相陪聞風謠藹然足慰  
所望夏暄萬萬自重

又

舊詩過煩鐫刻及墨竹橋字併蒙寄惠感愧兼集吳興

自晉以來賢守風流相望而不肖獨以罪去垢累溪山  
景純相愛之深特與洗飾此意何可忘耶在郡雖不久  
亦作詩數十首久皆忘之獨憶四首錄呈為一笑耘老  
病而貧必賜清顧幸甚

答蘇子平先輩二首

違別滋久思詠不忘中間累辱書教久不答知罪知罪  
遠煩專使手書勞問且審比日起居佳安感慰殊甚書  
詞華潤字法精美以見窮居篤學日有得也某九百粗

遣厄困既久遂能安之昔時浮念雜好掃地盡矣何時  
會合慰此

又

遠煩遣僕手書足矣更蒙厚惠足下困約中何力致此  
愧灼不可言也一一依數領訖感忤而已兒子令往荆  
南幹少事未還還即令答教也所要先丈哀詞去歲因  
夢見作一篇無便寄去今以奉呈無令不相知者見若  
入石則切不可也至祝至祝

與蔡景繁十四首

自聞車馬出使私幸得託迹部中欲少布區區又念以  
重罪廢斥不敢復自比數於士友間但愧縮而已豈意  
仁人矜憫尚賜記錄手書存問不替疇昔感悚不可言  
也比日履茲煩暑尊體何如無緣少奉教誨臨書悵惘  
尚冀以時保頤少慰拳拳

又

近奉書想必達比日不審履茲隆暑尊體何如某卧病

半年終未清快近復以風毒攻右目幾至失明信是罪重責輕召災未已杜門僧齋百想灰滅登覽遊從之適一切罷矣和愛之深輒以布聞何日少獲瞻望前塵惟萬萬為時自重

又

某謫居幽陋每辱存問漂落之餘恃以少安今者又遂一見慰幸多矣衝寒起居何如區區之素即獲面既

又

頒示新詞此古人長短句詩也得之驚喜試勉繼之晚  
即面呈

又

違濶數日悽戀不去心竊惟顧愛之厚想時亦反顧也  
比來跋履之暇起居何如某蒙庇如昨度公能復來當  
在明年秋矣某杜門謝客以寂默為樂耳乍遠萬乞為  
國自重

又

九百如常至後杜門觀壁雖妻子無幾見況他人也然  
雲藍小袖者近輒生一子想聞之拊掌也惠及人參感  
感海上奇觀恨不與公同遊東海縣一帆可到聞益奇  
偉曩恨不一往也公嘗往否大篇或可追賦果寄示幸  
甚幸甚

又

前日親見許少張暴卒數日間又聞董義夫化去人命  
脆促真在呼吸間耶益令人厭薄世故也少張徒步奔

喪死之日囊橐罄然殆無以斂其弟麻城令尤貧云無寸壠可歸想公聞之悽惻也料朝廷亦憐之如公言重可為一言否輒此僭言不深謹否

又

特承寄惠奇篇伏讀驚聳李白自言名章俊語絡繹間起正如此耳謹已和一首并藏笥中為不肖光寵異日當奉呈也坐廢已來不惟人言私亦自鄙不謂公顧待如此當何以為報冬至後便杜門謝客齋居小室氣味



深美坐念公行役之勞以增永歎春間行部若果至此  
當有少要事面聞近見一僧甚異其所得深遠矣非書  
所能一一

又

承愛女微疾令已必全安矣某病咳逾月不已雖無可  
憂之狀而無憊甚矣臨舉南畔竟添却屋三間極虛敞  
便夏蒙賜不淺胸山臨海石室信如所諭前某嘗携家  
一遊時家有胡琴婢就室中作篋索涼州凜然有兵車

鐵馬之聲婢去久矣因公復起一念果若游此當有新  
篇果爾者亦當戒奉和也呵呵

又

近專人還奉狀必達忽復中夏永日杜門無如思渴仰  
何不審履茲薄熱起居何似向雖畫扇比已絕筆昨日  
忽飲數酌醉甚正如公傳舍中見飲時狀也不覺書畫  
十扇皆遍筆迹粗略大不佳真壞却也適會人便寄去  
為一笑耳

又

黃陂新令李籲到未幾其聲藹然與之語格韻殊高比  
來所見小有才多俗吏傳輩如此人殆難得公好人物  
故輒不自外耳近葺小屋強名南堂暑月少舒蒙德殊  
厚小詩五絕乞示人

又

辱書伏承尊體佳勝驚聞愛女遽棄左右竊惟悲悼之  
切痛割難堪奈何奈何情愛著人如藕膠油膩急手解

雪尚為沾染若又反覆尋繹便纏繞人矣區區願公深  
照一付維摩莊周令處置為佳也劣弟久病終未甚清  
快或傳已物故故人皆有書驚問真爾猶不恤况慢傳  
耶無由面談為耿耿耳何時當復迎謁未間惟萬萬為  
國自重

又

近來頗佳健一病半年無所不有今又一時失去無分  
毫在者足明憂喜浮幻舉非真實因此頗知衛生之經

平日妄念雜好掃地盡矣公比來諸况何如刻刷之來  
不少勞乎思渴之至非筆墨所能盡也

又

西閣詩不敢不作然未敢便寫板上也閣名亦思之末  
有佳者蔡謨蔡廓名父子也晉宋間第一流輒以仰比  
公家不知可否徐秀才前會面聞留此書令請見此人  
有心膽重氣義試收錄之異日或有用也公許密石硯  
若有餘者可輟即付徐可也

與吳子野二首

少時在冊府嘗及接見先侍講下風死生契濶俯仰一  
世乃與君相遇江湖感歎不已辱訪山中殊不盡款意  
數日起居住否以拙疾畏風不果上謁解去漸遠萬萬  
以時自重

又

令子秀才辱長箋之賜辭旨清婉家法凜然飲味不已  
老拙何以為謝但有愧負

與幾道宣義

久放江湖務自屏遠書問之廢無足深訝比日侍奉之暇起居何如某九百如舊向者以公擇在舒時蒙相遇既去索然無復往還每思檻泉之遊宛在目前聞河決陽武歷下得無有曩日之患乎得暇遣數字慰此窮獨與江惇禮秀才五首

罪廢屏居忽辱示問累幅粲然覽之茫然自失比日侍奉外起居無恙僕雖晚生猶及見君之王父也追想一

時風流賢達豈可復夢見哉得所惠書詞章溫雅指趣  
近道庶幾昔人三復甚喜獨恨所稱道過當舉非其實  
想由相愛之深不覺云耳自是可略之也久不得貢父  
翁書因家信略為道意無緣面言臨紙惘惘

又

向示非國語論鄙意素不然之但未暇為書爾乃示甚  
善柳子之學大率以禮樂為虛器以天人為不相知云  
云雖多皆此類耳此所謂小人無忌憚者君正之大善



至於時令斷刑貞符四維之類皆非是前書論之稍詳  
今冗迫粗陳其略須見乃盡言然迂學違世不敢自是  
因君意合偶復云爾

又

所示徐君為朝中知之者亦衆不肖固嘗愛仰然老朽  
無狀豈能為之增重向者亦獲從諸公之後時掛一名  
以發揚遺士而近者不許連名此事便不繼然所示亦  
當在心有問焉固當以此告也

又

疊辱臨顧感忤無量錄示神告得聞前人偉蹟固後生之幸然事體不小未敢輒作文字非面莫究也

又

十論十二說已一再讀矣不獨歎文辭之美亦以見存誠求道之至也科舉數不利想各有時箕裘不廢半年可必也曾過江游寒溪西山否見邑人王文甫兄弟為致意近有書必達之矣

與徐司封

適辱車騎寵存感怍無窮晚來尊體佳勝某與陳君略  
出至安國遂覺拙疾稍作欲告明日少休後日恭與盛  
集可否無狀慙負多矣幸甚

答湖守滕達道

忽復中夏永日杜門思仰無窮比來起居何如張奉議  
來稍獲聞問甚慰所望府第已成雄冠荆楚足使來者  
想見公之風度無緣一寓目但有企想

答陳季常三首

侯馬鋪行奉書未達間領來誨具審起居佳勝至慰至  
慰答京洛書過當過當此何足稱先生篤於風義至自  
割瘦脰以啖我可謂至矣然以化不為鷺鷥者則恐未  
能也彼不相知者視僕之饑飽如觀越人之肥瘠耳雖  
象未易化也鄉諺有云缺口鑷子者公識之乎想當拊  
掌絕倒知過節入州甚幸未間萬萬自重  
缺口鑷子者  
取一毛不拔  
恐未嘗  
聞故及

又

別後九四辱書一一領厚意具審起居佳勝為慰又惠  
新詞句句警拔詩人之雄非小詞也但豪放太過恐造  
物者不容人如此快活一枕無礙睡輒亦得之耳公無  
多奈我何呵呵所要謝章寄去聞車馬早晚北來恐此  
書到日已在道矣故不覩縷

又

置中疊辱手示并惠果羞感愧增極酒隱堂詩當塗中

抒思不敢草草作公是大壇越宣復持牌也一笑

與錢世雄

久不奉書蓋無便亦懶怠之罪未深訝否比日起居何  
如某與賤累如常曾託施宣德附書及遺教經跋尾必  
達也吳江宦況如何僚有佳士否垂虹聞已復舊信否  
旅寓不覺歲復盡江上久居益可樂但終未有少田生  
事漂浮無根耳兒子明年二月赴德興人口漸少當稍  
息肩餘無可慮會合何時萬萬自愛因便往三衢奉啓

答任德翁

自蒲老行後一向冗懶不作書子姪來領手教感愧無  
量仍審尊體佳勝為慰昆仲首捷聞之欣快起我衰病  
矣當遂冠天下士蔡州未足云也陳季常歸又得動止  
之詳小四乃能爾師中不死矣此間九事可問小大更  
不瀕縷未期會晤萬萬自愛

與周主簿

罪廢衰朽過辱臨顧增愧汗也晚來起居佳勝甚欲詣

謝巾褐草野不敢造門幸加矜恕

與知郡朝散

前日辱降屈業已不出無緣造謝信宿尊體萬福筠州  
茶芽少許謾納上并利心肺藥方拜呈范醫昨呼與語  
本學之外又通星歷甚可嘉也

與文郎

不審荼毒以來氣力何似變故如昨兩易晦朔追慕無  
窮奈何奈何中前人還辱書重增哽咽吾親孝誠深篤



若不少節哀摧惟意所及不以後事為念何以仰慰堂上之心惟萬萬寬中強食

東坡全集卷八十